

PRIMER CIRCULAR

(26 d'octubre de 2015)

En 2007 tenió lugar en Zaragoza a I Trobada de Chovens Investigadors en Historia Contemporania como una activitat pionera en a realización de reunions destinadas a investigadores y investigadoras novels. Una decada y cinco Trobadas dimpués nos tornaremos a chuntar en a capital d'Aragón os días **6, 7 y 8 de setiembre de 2017** con motivo d'a celebración d'a **VI Trobada Internacional de Chovens Investigadors**, fendo parte asinas d'a tradición bianyal d'istos congresos. Ista Trobada prene asinas l'herencia d'as anteriors, querendoufrir un espacio de reunión y de debat pa meter en común os temas d'investigación en curso. A filosofía d'o evento ye priorizar debats horizontals y treball colectivo d'os chovens contemporanistas que son desembolicando a suya labor historiografica.

En ista PRIMER CIRCULAR ubrimos a convocatoria de propuestas pa as mesas-taller y Scriptoria endrezadas per una u varias coordinaderas. As proposants habrán d'emplir un formulario a o qual se puet acceder a traviés d'o blog y ninviar-lo t'a adreza joveneshistoria2017@gmail.com antes de l'uno de marzo de 2016. Quanto a os participants, en primerías no se contempla a posibilidad de proporcionar aloix y aduyas de transporte. Contino explicamos quála ye a filosofía y a normativa en tocant a istos dos espacios de debat y treball.

Mesas-taller: una d'as fins d'ista trobada ye evitar a fragmentación de tematicas historicas y potenciar o dialogo. Per ixo o Comité Organizador ha decidiu de fixar un numer de tallers que tortulará entre 15 y 20; de vez prescindiremos de propuestas de mesa d'una tematica masiau concreta y valuraremos a transversalidat; en cada mesa se considerará un maximo de 15 comunicacions sozmesas posteriorment a debat.

Replegadas as propuestas de mesas y dica o ninvio d'a SEGUNDA CIRCULAR (mayo de 2016) se procederá a una fase de renegociación entre os proposants y o Comité Organizador paplanteyar a posible fusión de mesas (fusión que no chunión) de tematicas pareixidas que puedan confluyir en un debat d'intrés cheneral. O Comité Organizador ruega que en as mesas-taller se prescinda d'as intervencions presonals sobre o texto de cada informador; en cuentas d'ixo, as coordinaderas fomentarán o debat a traviés d'a elaboración d'un dossier previo. Dito dossier facilitará a codesión de cada mesa (mas que mas d'aquellas fusionadas), centrará os eixes d'o debat y ferá innecesario o tradicional redolín de presentacions.

Scriptoria: a raíz d' experiencias previas en anteriores trobadas, a on que o debat y as ideyas no gosaban surtir en as mesas-taller sino dimpués, naixió a ideya d' os Scriptoria, porque participar en un Congreso va dillá de presentar un paper. Alavez, ¿qué son os Scriptoria?: en esencia consisten en un proxecto de traballo colectivo que se fa antes, mientres y dimpués d' a Trobada. A suya fin ye meter en contacto a investigadores y investigaderas que quieran desembolicar u encomenzar proxectos de diferent mena academica, investigadera u divulgativa d' a Historia. Ye un proceso vivo, ubierto y innovador a on que culle quasiqualsiquier ideya que s' aleixe d' una mesa-taller tradicional.

Asinas pues un Scriptoria puet estar, per eixemplo:

- Quitar adebant una obra colectiva como un monografico, un articlo, un libro.
- Empecipiar una publicación periodica.
- Fer un proxecto de memoria oral.
- Organizar una exposición.
- Ideyar una ruta historica.
- Fer proxectos d' esparidurahistorica, como documentals...
- Organizar un debat sobre una metodolochíahistoriografica.
- Un taller d' escritura d' a historia, etc.

As propuestas se ninviarán igualmente t' o correu indicau con un maximo previsto de 8 Scriptoria. Quan se reciba a propuesta d' un Scriptoria se ferá publico en a web d' a Trobada pa que qualsiquier presona intresada pueda sumar-se-ie. Respective a la calendata de recepción, se retrasará o que calga dica que s' afinquen ditas collas.

Zarrau o plazo, o Comité Organizador dará respuesta sobre a configuración d' as mesas-taller y Scriptoria antes con antes, y antes d' o ninvio d' a SEGUNDA CIRCULAR. Tras os mentausninvios se dará confirmación con acuse de recibo.

Agradeixendo anticipadamente a vuestra atención, recibitz un afectuoso saludo.

O Comité Organizador